



**PARLAMENTO  
NACIONAL**

**República Democrática de Timor-Leste  
GABINETE DO PRESIDENTE**

---

DISKURSU SUA EXSELÉNSIA SENHOR PREZIDENTE PARLAMENTU NASIONAL

Dr. Aniceto Longuinhos Guterres Lopes

IHA REUNIAUM PLENÁRIA SOLENE BA ABERTURA SESAUN DA-TOLU KINTA  
LEGISLATURA NIAN

15 setembro 2020

Sua Excelência Senhor Presidente da República, Dr. Francisco Guterres “Lu-Olo”

Sua Excelência Senhor Primeiro Ministro VIII Governo Constitucional, Jeneral Taur Matan  
Ruak

Sua Excelência Senhor Prezidenti Tribunal de Recursos, Dr. Deolindo dos Santos

Sua Excelência Senhor Procurador Geral da República, Dr. Jose da Costa Ximenes

Sua Excelência Senhor Chefe Estado Major General das F-FDTL, Major General Lere  
Anan Timur

Sua Excelência Senhor Comandante Geral da PNTL, Faustino da Costa

Sua Excelência Senhora Prevedora de Direitos Humanos e Justiça, dra Jesuina Gomes

Sua Excelência Senhor Comissário Comissão Anti-Corrupção, Dr. Sergio Hornai

Excelências Senhores ex-Presidentes do Parlamento Nacional

Excelências Senhores Vices-Presidentes do Parlamento Nacional e restantes Meja do PN

Senhores Líderes das Bancadas Parlamentares

Senhores Presidentes e restantes Mejas das Comissões Especializadas Permanentes

Senhores Deputados,

Senhora Secretária Geral

Senhores Membros do VIII Governo Constitucional

Senhores Representantes da Associação dos ex-deputados da PN

Povo Timor-Leste, nebe namkari iha territoiu tomak no iha estrangeiru mak hau respeita.

Povu mak nain ba demokrasia, povu mak soberania no poder politiku nia hun. Liu husi demokrasia mak ita konstroe poder politiku no hametin ita nia soberania. Liu husi demokrasia mak ita halo alternansia ba ukun-nain sira iha organizasaun poder politiku iha Timor-Leste.

Hahu 2017 Timor-Leste hasoru desafios boot lobuk ida kona ba governasaun Estadu nian, kona ba konsolidasaun no continuidade lideransa Estadu no kona ba relasionamentu institucional. Desafio hirak ne'e akontese iha prosesu implementasaun demokrasia iha Timor-Leste, liu husi instrumentus demokrasia rasik. Partidos politikus mak instrumentu iha dinamizasaun demokrasia no nudar instrumentu Estadu nian ba continuidade governasaun no lideransa Estadu.

Iha desafio hirak ne'e nia laran, iha 2017, mak hau asume responsabilidade nudar Prezidenti Parlamentu Nasional IV Legislatura ba tempu badak. No sei iha desafio hirak ne'e mak hau asume fila fali responsabilidade nudar Prezidenti Parlamentu Nasional iha V Legislatura nia klaran. Dala ida tan motivadu ho koragein no propóztu nebe diak ba Estadu tomak no hodi kontribui ba supera no buka solusaun ba desafio hirak ne'e hotu mak hau asume fila fali responsabilidade nudar Prezidenti ba Orgaun Soberania ida ne'e.

Diskursu ida ne'e hau hatoo nudar Prezidenti Parlamentu Nasional, nebe hau seidauk halo depois asume kargo iha fulan Maiu liuba, no hatoo iha okaziaun abertura solene Sesaun Legislativa da-tolu iha Kinta legislatura. Observa no ciente ho situasaun nebe agora lao dadaun, hau koloka nafatin asuntu balu nebe sei relevante atu konsidera husi agora ba oin, nebe hau temi ona iha hau nia diskursu iha Abertura Kuarta Legislatura iha Setembro tinan 2017.

Senhoras no Senhores Deputado,

Excelências,

Dinamika demokrasia iha Timor-Leste, povo nia vontade politika no qualidade komunikasaun entre lideres partidos politiku mak forma conjuntura politika iha Parlamentu Nasional no iha Governu. Faktu hatudu katak husi tinan 2007 too 2018 laiha eleisaun parlamentar ida nebe rezulta partidu politiku ida mesak atingi maioria absoluta.

Realidade ida ne'e marka conjuntura politika unika ida iha Parlamentu no iha Governu durante jornada konstrusaun Estado no governasaun iha Timor-Leste, tinan 20 nia laran. Ita iha parlamentu ho opozisaun parlamentar no ho insidencia parlamentar, ita iha governu ho maioria abosoluta, iha governus koligasaun maioria, iha governu ho insidencia governativa no iha governu ho koligasaun minoria. Situasaun hirak ne'e hatudu katak sosiedade Timor-Leste halo hela teste no kontesta rasik nia vontade no opsaun politika no dirige messagein importante ida ba lideres partidos politiku, figuras eminentes no ba gerasaun kontinuidora sira katak komunikasaun nudar elementu esencial iha nivel no kategoria hotu-hotu hodi asegura kontinuidade lideransa Estado no governasaun nebe sustentavel no solidu. Buka malu no komunika ba malu ho haraik-an hodi konserta entendimentu kona ba interesse nasional. Ida ne'e fo hanoin kedas katak komunikasaun ka dialogo entre lideres partidu politiku sira, nudar etapa indispensavel ida depois hetan tiha rezultadu eleisaun. Komunikasaun mak dalan hodi hetan entendimentu no konsensus hodi reforsa sentidu Estado no materializa konfiansa nebe povu fo ba partidu sira, hodi organiza no orienta desenvolvimentu ba povo tomak nia prosperidade.

Senhoras no Senhores Deputado,

Excelencias

Pandemia Covid-19 fo tan todan adisional ba Estado, para alem de todan nebe mai husi sosiedade Timor-Leste nia perkursu historiku no dinamika demokrasia iha ita nia rai. Felizmente Covid-19 seidak oho ita nia sidadaun ida, maibe ita seidak iha serteza katak nia potencia dezastroza sei remata iha tempu badak no ita eskapa ona husi virus ida ne'e. Cientistas no perito sira seidak deskobre nia aimoruk no meius adekuardu para hamate virus nia espansaun.

Estadu foin mak foti medidas temporaria iha faze emergencia hasoru Covid-19, seidak iha medidas estruturante no programada nebe garante ita nia kapasidade hasoru pandemia ne'e iha tempu naruk. Tanba ne'e importante tebes ba Parlamentu Nasional no Governu elabora politika no legislasaun nebe fo kbiit ba Estadu tomak hodi foti medidas adekuaudu longo prazu hasoru Covid-19. Medidas estruturantes hanesan revizaun ba Lei Sistema Saude, revizaun ba Lei Migrasaun no Asilo no Lei ba Protesaun Civil, presiza fundamenta ho abordagein nebe klean no aplikavel. Para alem de medidas internas saude publika nian, ita tenki estabelese mos medidas ekonomikas ho poupansa no reforsa ita nia politika no planu rekoperasaun ekonomika hodi bele mantein vida ekonomika Timor-Leste la bele monu too nivel nebe afeta estabilidade no seguransa nasional.

Covid-19 fo impaktu makas ba saude publika mundial no ba ekonomia mundial nebe ultrapassa fronteiras nasional no bele espande too ita nia uma laran. Ne'e duni, Estadu Timor-Leste tenki hasae nia kapasidade hodi kontrola movimentos pesoal estrangeiru nebe tama-sai Timor-Leste, hasae ita nia kapasidade vigilansia no kapasidade politika no diplomatika hodi kontribui mos ba medidas preventivas global.

Desentendimentu no divergensia pozisaun politika hamutuk ho pandemia Covid-19, no sira nia impakto ba povu nia moris sosial no ekonomiku, halo mandatu ida ne'e todan liu tinan hirak liu ba, laos mai hau deit **nudar Prezidenti Parlamentu** maibe ba Deputadu ida-idak, ba partido sira ho assento iha Parlamentu no ba Parlamentu Nasional nudar orgaun kolejial nebe reprezenta povu tomak. Parlamentu Nasional nudar fatin sentral ba atividades politika, fatin ba desizaun boot lobuk ida iha Estadu no fatin ba konjuga vontade no hanoin kona ba desenvolvimentu nasional no enkuadramentu Timor-Leste iha konvivensia regional no internacional.

Tanba ne'e mak Parlamento Nasional tenki sai fatin ba komunikasaun ka dialogu, fatin ba debate franco no honesto ho sentido estado no sentido altroismu ba interese nasional. Parlamento mos bele sai fatin ba rekonsiliaun hodi konserta no konsentra esforsus ba interesses komun, ba konsolidasaun Estadu de Direito Democrático no ba estabilidade no prosperidade nasional. Konsertasaun no konsentrasaun esforsus hirak ne'e presiza enkuadra nafatin iha poderes legislativo, poder desizaun politika no poder fiskalizadora nebe Konstituisaun atribui ba Parlamentu Nasional.

Iha aspetu rua relasiona ho kompetensia legislativa nebe Parlamentu tenki tau atensaun: koordenasaun no konsertasaun ho Governu kona ba agenda legislativa; no eskrutiniu atentu

no kompetente hodi halo justifikasaun adekuada no fundamentasaun sufisiente ba proposta ka projetu lei sira hodi asegura kualidade produsaun legislativa nebe benefisia povu. Iha kontekstu ida ne'e merese fo atensaun makas ba lé no hanoin, hanoin no hakerek, hanoin no koalia. Forma eskrutiniu ida ne'e bele hatudu mos ho kapasidade fiskalizaun legislativa.

Hodi bele alkansa pleno kumprimentu ninia funsaun konstitusionál, mak Parlamentu Nasional estabrece objetivu estratéjiku ida ba período 2017-2022 atu asegura katak lei (1) no política pública sira reflète sidadaun sira-nia nesidade. Atu garante realizaun objetivu ida ne'e mak presiza (a) komunikaun dinámika no permanente entre Deputadu sira no eleitór sira; (b) konkretiza direito ba petisaun no partisipasaun ativa sociedade sivil iha servisu PN nian. (2) No mos akompanha proativamente legislasaun ne'ebe produz husi Governo. Área ida-ne merese ita-nia atensaun máxima, ho servisu makás, hodi fo dalan ba sociedade nia kontribuisaun iha atividade parlamentar, la os deit iha debate legislasaun, maibe prinsipalmente iniciativa sociedade ninia konaba leis ne'ebe presiza kria ka presiza modifika. Fo atensaun liu ba comunidade ka sidadaun sira ne'ebe la hetan reprezentaun adekuada, katak la inklui iha sociedade sivil organizada, ho kriaun espasu ba promove sira nia partisipação efetiva. Dalan ida ne'e importante ba komunikaun dinámika no permanente entre Deputadu no sidadaun sira iha sira nia funsaun Representasaun Demokrátika. Parlamentu Nasional mos presiza servisu makas hodi halakon frakeza sira nebe liga bá área akompañamentu no fiskalizaun produsaun legislativa husi Governu no akompañamentu implementasaun leis ne'ebe Parlamentu Nasional aprova.

Sua Excelência Prezidenti Repúblika foin mak promulga Medidas Prevensaun no Kombate Korrupsaun iha fulan ida liu ba. Para alem de leis estruturantes seluk, Parlamentu Nasional presiza diskuti mos enkuadramentu legal seluk nebe tenki iha, hodi reforsa movimentu prevensaun no kombate korrupsaun iha Timor-Leste. Reforsa kapasidade técnica especializada, administrativa no finanseira instituisaun Estadu nian sira nebe halao funsaun iha area ida ne'e.

Fiskalizaun politika, fiskalizaun atividades no ezekeusaun orsamentu Estadu nian nudar funsaun importante seluk hodi asegura kualidade no benefisiu husi dezvoltamentu ba povu nia moris. Fiskalizaun hirak ne'e presiza orienta ba komunikaun regular entre Parlamentu no Governu iha sessoens esklaresimentu ka debate iha Parlamentu Nasional, tanto iha sessoens plenário ka iha sessoens Komisaun nian. Formas fiskalizaun ho kualidade no komunikaun regular tenki sai lisan ka prátika baibain ida entre Parlamentu ho Governu no ho entidades não governamental sira. Habitu ida ne'e sei lori parte hotu-hotu ba dezempenha

sira nia funsaun diak liu tan husi loran ba loran. Komunikaun regular ne'e eziji mos Deputado sira hasae nafatin sira nia kompetensias téknika iha aspetu hotu-hotu nebe kontribui ba kualidade dezempenu funsoens.

Habitu ne'e presiza kria liu husi estabelese kalendáriu anual ida ba debates regulares ho Governo no ho Primeiro Ministro, tuir formatu ne'ebe konsagra ona iha Rejimentu Parlamentu Nasional konaba matéria fiskalizaun política. Ne'e sai hanesan dezafiu ba Mesa Parlamentu Nasional no Konferência Líderes Bancadas Parlamentares. Sesaun lejislativa ne'ebe hahu ohin-loron bele sai ponto de partida no referénsia ba prática foun ida-ne'e. Karik ita consegue organiza debate ho Ministros hotu, pelo menos dala ida iha tinan ida nia laran.

Deputado sira ka Parlamentu Nasional labele halao sira nia funsoens ho diak no ho kualidade sem espasu propriu no adekuaudu. Tanba ne'e mak iha Legislatura ida ne'e ita presiza fo continuidade ba esforsus ba halo konstrusaun sede Parlamentu Nasional foun nebe hahu tiha ona desde primeira Legislatura. Alem de espasu propriu, necessariu tebes atu iha apoiu tekniku especializadu, apoiu administrativu no gestaun nebe ho kualidade, inparsial no honestu husi servisus administrasaun parlamentar. **Nudar Prezidenti Parlamentu Nasional** hau ezizi mos funsionarios publiku no pesoal tekniku halao sira nia funsaun tuir prinsipius **integridade, inparsialidade, apartidarismu no ho dedikasaun** iha unidades organikas hotu-hotu. Preokupasaun ida ne'e presiza responde mos enkuadramentu organizaun funsionamentu administrasaun parlamentar nebe efikaz no efetivu.

Aspetu esensial seluk ida mak interasaun ho sidadaun sira. Iha aspetu ida ne'e, hau propoen atu kria Komisaun Especializada Permanente Cidadania, nebe ho papel estabelese mekanismu partisipasaun públika iha atividade parlamentar balu, hanesan debates, audiencias, esklaresimentu hamutuk ho Deputadu no membro Governu sira. Nee forma ida hodi fo continuidade ba demokrasia partisipativa no hakbesik relasaun povu ho nia representante sira no governante sira.

Parlamentu Nasional iha fraqueza boot ida nebe relasiona ho teknologia komunikaun no informasaun, nebe hatudu ho falta-aproveitamentu másimu liu-husi website hodi hatutan informasaun ba publiku. Website sai hanesan ferramenta diak ida hodi haforsa komunikaun entre instituisaun ho públika, ka "ko'alia" diretamente ho públika, laos hatoo notísia deit, maibe fornece documentos ne'ebe PN produz no simu husi parte relevante sira, kona ba processo lejislativo no orsamentu jerál Estadu nian, textu iniciativas lejislativas, relatórios

Komisaun sira nian, rezultadu votasaun iha jeneralidade, propostas alterasaun no relatórios iha espesialiade no mos textu aprovaudu iha votasaun final global. Nune'e mos processo seluk hanesan fiskalizasaun orsamentál no fiskalizasaun polítika.

Ho ida-ne'e ita bele haforsa laos deit ita nia kapasidade hodi fornese informasaun no aumenta públiku nia koñesimentu konaba PN nia atividade, maibe hatudu mos transparénsia iha PN nia dezempeñu no nakloke ba eskrutíniu públiku. Ita bele halakon desafio hirak ne'e, tanba iha meius no kapasidade téknika, maibe presiza tan vontade, desizaun no disciplina profisional.

Senhoras no Senhores Deputados,

Excelências,

**Nudar Prezidenti Parlamentu Nasional** hau konvida hotu-hotu, tantu individu ka nudar orgaun kolejial representante povu nian, mai ita hatudu ita nia preokupasaun kona ba desafio sira nebe ita hasoru dadaun no hatudu ita nia kontribuisaun ba fo solusaun. Ne'e duni ita tenki forma no konserta bebeik ita nia komportamentu fungsional no politiku ho disciplina, ho empenho, dedikasaun, **servisu makas ho sentidu altroismu**, hamenus pre-supostos desnesesarios no esbanjamentu rekursos. Ezigensia hanesan husu mos ba bankada no nia líder sira to'o partido nia dirigentes, kuadrus no militante sira, atu hotu-hotu informadu no halo parte ativu iha prosesu buka solusaun ba desafio sira nebe Timor-Leste hasoru dadaun. Ita hotu nia papel no kontribuisaun mak lori Timor-Leste ba supera deafio sira no kondisiona dalan ba atingi objetivus Estadu nebe proklama iha artigo 6 Kostituisaun RDTL no orienta dezevolvimentu ba atingi **prosperidade ba povu tomak**.

Pátria no Povo hein katak ita bele mantein dame no estabilidade, ita bele hari'i governu ida ho baze de apoio parlamentar ne'ebe excelente, hodi sustenta governasaun ida ne'ebe estável, hodi lori **povu ba moris diak holistika**. Patria no Povo hein ita hatudu asaun parlamentar eficaz hodi representa fielmente sira nia interese wainhira ita foti desizaun polítika, wainhira ita halo lei, wainhira ita aprova orsamentu, wainhira ita fiskaliza Governo nia atividade.

**Nudar Prezidenti Parlamentu Nasional** hau konvida no enkoraja ita hotu-hotu hamutuk halibur ita nia vontade no kapasidade ba **rezolve rasik ita nia problemas**.

Tenho dito

Obrigado!